



Sumáriu Kazu
Tribunál Judisiál Primeira Instánsia Baukau
Janeiru 2025

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulnerável. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Baukau

1. Totál kazu ne'ebé JSMP monitoriza: 18

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	13
Ofensa ba integridade física simples ho natureza violénsia doméstika no artigu 2(nú.1(b), nú. 2(f)) no artigu 20(nú.1) hosi Lei Nú. 5/2017	Ofensa ba integridade física simples ho natureza violénsia doméstika no Arma brankas	1
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no ameasa	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

no Artigu 157 KP		
Artigu 145 Kódigu Penál (KP)	Ofensa ba integridade física simples	1
Artigu 171 Kódigu Penál (KP)	Koasaun seksuál	1
Artigu 278 (1) Kódigu Penál (KP)	Falsidade iha depoimentu ka deklarasaun	1
Totál		18

2. Totál desizaun ne'ebé JSMP monitoriza: 13

Tipu desizaun	Artigu	Númeru
Prizaun	66 KP	0
Suspensaun ba prizaun nia ezekusaun	68 KP	2
Multa	67 KP	11
Absolve		0
Totál		13

3. Totál kazu ne'ebé sei kontinua prosesu tur JSMP nia monitorizasaun : 5

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0023/24.BCSIC
 Kompozisaun Tribunál : Singulár
 Juis : Dra. Sribuana da Costa
 Prokuradór : Dr. Bartolomeu de Araújo
 Defeza : Dra. Laura Valente Lay
 Desizaun : Pena multa US\$60.00

Iha 16 Janeiro 2025, Tribunál Judisiál Primeira Instánsia Baukau, prezide leitura sentensa ba kazu ofensa ba integridade física simples ho natureza VD ne'ebé envolve arguidu CDF (oan) hasoru nia aman, iha Munisípiu Baukau.

Akuzasaun Prokuradór

Prokuradór akuza katak, iha 24 Marsu 2024, iha oras tuku 20:00 kalan, arguidu ho kondisaun lanu hakilar ho maka'as iha uma, Tanba ne'e ofendidu hase atu arguidu labele hakilar tan. Maibé arguidu nervozu ho forsa dudu ofendidu ba parede resulta

ofendidu sente moras. Nune'e ofendidu ba hato'o kedas keixa iha Polisia Eskuadra Baukau Vila.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu arguidu deklara katak faktu iha akuzasaun ne'e loos hotu, depoisde akontese di'ak malu ona no husu ona deskulpa ba ofendidu nu'udar aman, arrepende ninia hahalok no promete sei halo tan hahalok ne'e iha futuro. Arguidu deklara katak foin primeravés mai hatan iha tribunál no nu'udar negosiante fa'an obralan laiha rendimentu ne'ebé fixu kada fulan.

Alende ne'e, ofendidu mós konfirma faktu sira iha akuzasaun no deklara katak depoisde akontesementu ne'e di'ak malu ona no to'o agora arguidu la halo tan problema seluk hasoru ofendidu no ema seluk.

Alegasaun finál

Prokuradór haktuir katak, akuzasaun prokuradór nian provadu bazeia ba arguidu nia deklarasaun no ofendidu nia konfirmasaun ba akuzasaun. Mezmu sira di'ak malu ona, maibé atu prevene arguidu la repete hikas nia hahalok ne'e iha futuro no arguidu mós sei joven bainhira hemu tua sempre halo barullu iha uma. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza haktuir katak bazeia ba produsaun prova ne'ebé produs iha audénsia julgamentu husu ba tribunál atu kondena arguidu ho fó pena admoestasaun.

Desizaun

Depoisde avalia faktu hotu, tribunál konsidera katak faktu hotu iha akuzasaun prokuradór nian provadu hotu.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona no husu ona deskulpa ba ofendidu no promete sei la komete tan krime hanesan iha futuro no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

2. Krime ofensa ba integridade física simples ho natureza violénsia doméstika

Nú. Prosesu	: 0006/24. BCVMS
Kompozisaun Tribunál	: Singulár
Juisa	: Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Laura Valente Lay

Desizaun : Pena multa US\$30.00

Iha 16 Janeiro 2025, Tribunál Judisiál Primeira Instáncia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu PFF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha lora no fulan ne'ebé haluha ona, maibé iha tinan 2022, iha oras tuku 12:00 meiodia, arguidu uza fatuk tuku dala ida iha ofendida nia ulun rezulta kanek no raan. Antes ne'e, arguidu ho ofendida diskute malu kona-ba arguidu hemu tiha sira nia oan nia bee.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontesementu ne'e sira di'ak malu ona, arrende ninia hahalok, foin primiravés mai hatan iha tribunál nu'udar agrikultór no laiha rendimentu fiksi.

Alende ne'e, ofendida konfirma faktu sira hotu iha akuzasaun no deklara katak depoisde akontesementu ne'e sira di'ak malu ona no to'o agora arguidu la baku ona ofendida.

Alegasaun finál

Prokuradór haktuir katak arguidu konfesa faktu hotu iha akuzasaun no konfirma mós hosi ofendida. Prokuradór konsidera katak arguidu nia aktu ne'e priense duni krime ne'ebé akuza ba arguidu, ofendida nu'udar arguidu nia feen tuir loloos arguidu mak proteze ofendida maibé pelu kontrariu arguidu mak halo fali agresaun hasoru ofendida. Tanba ne'e husu ba tribunál atu kondena arguidu ho pena multa US\$30.00.

Entretantu, defeza haktuir katak iha produsaun ba prova arguidu konfesa integralmente ba faktu sira iha akuzasaun sein rezerva, arrende ninia hahalok no foin primeiravés mai hatan iha tribunál. Tanba ne'e husu ba tribunál atu kondena arguidu ho pena admoestasaun.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstáncia atenuante sira hanesan arguidu konfesa, arrende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 sentavus kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu : 0002/23.VQWCB
Kompozisaun Tribunál : Singulár
Juisa : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Sidónio Maria Sarmiento
Desizaun : Pena multa US\$30.00

Iha 20 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu LQ hasoru nia oan fetu, iha Munisípiu Vikeke.

Akuzasaun Prokuradór

Prokuradór akuza katak iha 01 Janeiro 2023, iha oras tuku 12:00 meiodia, arguidu basa dala rua iha ofendida nia hasan parte loos no karuk, basa dala ida ihaibun. Antes ne'e, ofendida istori malu ho viziñu sira, nune'e arguidu husu tuir to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu. Arguidu esplika katak motivu arguidu halo agresaun hasoru ofendida, tanba ofendida ho viziñu istori malu no tolok malu iha dalan públiku, ne'e mak arguidu moe hase ofendida, maibé ofendida la rona ne'e mak arguidu hirus hodi basa ofendida. Arguidu deklara katak sira di'ak malu ona, arrepende ninia hahalok, foin primeiravés halo agresaun hasoru ofendida, serbisu nu'udar agrikultór rezultadu hodi sustenta de'it ba família.

Bazeia ba pedidu hosi prokuradór, nune'e tribunál presinde ofendida nia deklarasaun, tanba iha produsaun ba prova arguidu konfesa integralmente ba faktu hotu iha akuzasaun no hosi parte defeza konkorda ho pedidu ne'e.

Alegasaun finál

Prokuradór haktuir katak haree ba arguidu nia deklarasaun ne'ebé konfirma akuzasaun, mezmu arguidu hanorin ofendida nu'udar oan maibé aktu ne'ebé arguidu uza hodi ofende ofendida nia isin ne'e mak krime. Tanba ne'e husu ba tribunál kondena arguidu ho pena multa US\$30.00.

Entretantu, defeza haktuir katak haree ba produsaun prova parte defeza husu ba tribunál fó pena kmaan ba arguidu.

Desizaun

Depoisde avalia faktu hotu, tribunál prova katak akuzasaun prokuradór nian provadu hotu, bazeia ba deklarasaun arguidu nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0.50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza violénsia doméstika

Nú. Prosesu : 0062/24. PDBAU
Kompozisaun Tribunál : Singulár
Juisa : Dra. Maria Modesta d. A. Viera
Prokuradora : Dra. Remizia de Fátima da Silva
Defeza : Dr. Germano Guterres Ramos
Desizaun : Pena multa US\$50.00

Iha 21 Janeiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AFS hasoru nia feen, iha Munisípiu Baukau.

Akuzasaun Prokuradora

Prokuradora akuza katak iha loron ne'ebé ofendida haluha ona, maibé maizumenus iha Fevereiru 2024, arguidu tuku dala ida iha ofendida nia ulun no basa dala ida iha hasan parte loos. Antes ne'e, arguidu ho ofendida diskute malu kona-ba ofendida husu arguidu atu kous labarik nune'e ofendida atu ba haris fatin maibé arguidu lakohi.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Produsaun ba prova sira

Prosesu julgamentu, arguidu deklara katak faktu iha akuzasaun ne'e laloos, tanba momentu ne'e ofendida mak husu arguidu dehan atu ba nia inan aman sira nia uma. Nune'e arguidu hatan katak bele ba maibé Domingu fila fali, maibé bainhira arguidu ba tiha natar no fila mai uma haree ofendida ba tiha ona. La'os arguidu mak halo agresaun no duni ofendida, arguidu mós deklara katak seidak di'ak malu tanba ofendida nia inan aman mak lakohi ona arguidu atu moris ho ofendida. Arguidu deklara liutan katak foin primeiravés mai hatan iha tribunál, arguidu nu'udar agrikultór ho rendimentu ne'ebé mak la fiksi.

Iha parte seluk, ofendida konfirma faktu sira iha akuzasaun no deklara katak depoisde akontesementu ne'e sira sidauk di'ak malu to'o agora.

Alegasaun finál

Prokuradór haktuir katak mezmu iha julgamentu arguidu nega faktu sira iha akuzasaun, maibé iha deklarasaun arguidu nian bainhira delijénsia iha prokuradór nia fatin arguidu deklara katak halo agresaun hasoru ofendida hanesan faktu ne'ebé iha akuzasaun no

ofendida mós konfirma ho akuzasaun sein rezerva. Ho nune'e husu ba tribunál atu kondena arguidu tuir aktu ne'ebé komete hasoru ofendida.

Entretantu, defeza haktuir katak haree ba produsaun ba prova iha audénsia julgamentu husu ba tribunál fó pena ne'ebé justu ba arguidu.

Desizaun

Depoisde avalia faktu hotu, tribunál konsidera faktu hotu provadu mezmu iha audénsia julgamentu arguidu nega faktu hotu, maibé ofendida konfirma faktu hotu iha akuzasaun.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$50.00. Pena ne'e arguidu sei selu 0.50 sentavus kada loron durante loron 100. Tribunál mós fiksa pena alternativa durante loron 66 prizaun, bainhira arguidu la kumpri pena multa refere.

5. Krime ofensa ba integridade física simples ho natureza violénsia doméstika

Nú. Prosesu : 0001/24. BCLGA
Kompozisaun Tribunál : Koletivu
Juisa : Dra. Maria Modesta d. A. Viera, Dra. Albertina da
Concição das Neves no Dra. Maria Solana da C. Fernades
Prokuradora : Dra. Remizia de Fátima da Silva
Defeza : Dr. Albino de Jesus Perreira
Desizaun : Pena multa US\$50.00

Iha 23 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu JMX hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 28 Janeiro 2024, iha oras tuku 21:00 kalan, arguidu uza telefone marka oppo hodi tuku dala ida iha ofendida nia matan fukun parte loos, basa dala ida iha hasan parte karuk tanba arguidu ho ofendida diskute malu kona-ba ofendida joga karta PS iha viziñu sira nia uma. Aktu ne'e rezulta ofendida sofre moras no bubu iha ofendida nia matan fukun no hasan.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(b), 35(a) no 36 LKVD.

Produsaun ba prova sira

Iha julgamentu arguidu deklara katak faktu no motivasaun problema iha akuzasaun ne'e loos hotu. Arguidu foin primeiravés mai hatan iha tribunál, di'ak malu ona no to'o agora la baku ona ofendida no arguidu nu'udar professór ho vensimentu kada fulan US\$344.00.

Alende ne'e, ofendida mós kontinua konfirma faktu sira iha akuzasaun no konfirma mós ho arguidu nia deklarasaun katak ofendida sempre joga karta PS no momentu ne'e ofendida joga karta hosi oras tuku 12:00 meiodia to'o tuku 16:00 lokraik.

Alegasaun finál

Prokuradór haktuir katak, arguidu provadu komete krime maus-tratus ba kónjuje hasoru ofendida nu'udar nia feen, nune'e husu ba tribunál atu kondena arguidu tuir aktu ne'ebé komete hasoru ofendida.

Entretantu, defeza haktuir katak bazeia ba produsaun prova sira, husu ba tribunál atu halo alterasaun jurídiku hosi krime maus-tratus ba kónjuje ba fali krime ofensa ba integridade fízika simples ho natureza VD no husu ba tribunál atu kondena arguidu ho pena ne'ebé justu.

Desizaun

Depoide avalia faktu hotu ne'ebé produs durante julgamentu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e no haree ba faktu provadu sira, hanesan arguidu baku dala ida deit no bazeia mós ba relatóriu médiku, ho nune'e tribunál koletivu halo deliverasaun hodi halo alterasaun jurídiku hosi artigu 154 KP kona-ba maus-tratus ba kónjuje ba fali artigu 145 KP kona-ba ofensa ba integridade fízika simples ho natureza violénsia doméstika. Nune'e tribunál konklui prosesu ne'e no kondena arguidu ho pena multa US\$50.00 ne'ebé arguidu sei selu 0,50 sentavus kada loron durante loron 100. Tribunál mós fiksa pena alternativa durante loron 66 prizaun, bainhira arguidu la kumpri pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu : 0040/23. VQVQQ

Kompozisaun Tribunál : Koletivu

Juisa : Dra. Maria Modesta d. A. Viera, Dra. Albertina da

Concição das Neves, no Dra. Maria Solana da C. Fernades

Prokuradora : Dra. Remizia de Fátima da Silva

Defeza : Dr. Albino de Jesus Perreira

Desizaun : Pena multa US\$80.00

Iha 23 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu FSV hasoru nia feen, iha Munisípiu Vikeke.

Akuzasaun Prokuradór

Prokuradór akuza katak, iha 20 Jullu 2023, iha oras tuku 17:00 lokraik, ofendida dudu no rakut arguidu, nune'e arguidu nervozu tuku dala ida iha ofendida nia ulun, buti ofendida nia kakorok no tuku dala ida iha ofendida nia matan fukun parte loos. Antes

agresaun ne'e, arguidu ho ofendida diskute malu kona-ba arguidu amante (*selingkuh*) ho fetu seluk.

Antes ne'e iha tinan 2019, arguidu tuku dala ida iha ofendida nia kotuk laran, kazu ne'e akontese arguidu ho ofendida diskute malu kona-ba hola malu kleur ona, maibé seidak iha oan.

Prokuradór akuza arguidu kontra artigu 154 KP kona-ba maus-tratus ba konjuje ho moldura penál tinan 2 to'o tinan 6 konjuga ho artigu 2, 3(b), 35(b) no 36 LKVD.

Produsaun ba prova sira

Iha produsaun ba prova, arguidu deklara katak faktu no motivasaun problema iha akuzasaun ne'e loos hotu, di'ak malu ona, arrepende ninia hahalok, foin primeravés mai hatan iha tribunál no arguidu nu'udar diretór PNDS ho vensimentu kada fulan US\$729.00

Alende ne'e, ofendida konfirma faktu hotu iha akuzasaun no deklara tan katak sira moris hamutuk dezde tinan 2013, mezmú seidak iha oan, arguidu foin halo agresaun dala rua hasoru ofendida no depoisde akontese arguidu la halo ona agresaun to'o agora.

Alegasaun finál

Prokuradór haktuir katak arguidu konfesa integralmente ba faktu sira sein rezerva inklui ofendida nia konfirmasaun ba akuzasaun, arguidu halo tratamentu kruel hasoru ofendida. Ho razaun hirak ne'e husu ba tribunál atu kondena arguidu tuir aktu ne'ebé mak arguidu komete hasoru ofendida.

Entretantu, defeza haktuir katak haree ba produsaun ba prova arguidu konfesa integralmente sein rezerva, arrepende nia hahalok no foin primeiravés mai hatan iha tribunál. Tanba ne'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e, nune'e tribunál koletivu halo deliverasaun hodi halo alterasaun jurídiku hosi artigu 154 KP kona-ba maus-tratus ba kónjuje konjuga ho artigu 2, 3(b), 35(a) no 36 LKVD hodi altera ba artigu 145 KP kona-ba ofensa ba integridade fízika simples ho natureza violénsia doméstika. Depoisde halo alterasaun, tribunal konklui prosesu ne'e hodi kondena arguidu ho pena multa US\$80.00 ne'ebé arguidu sei selu US\$1.00 kada lora durante lora 80. Tribunál mós fiksa pena alternativa durante lora 53 prizaun, bainhira arguidu la kumpri pena multa refere.

7. Krime ofensa ba integridade fízika simples ho natureza violénsia doméstika

Nú. Prosesu : 0004/24. VQOSU

Kompozisaun Tribunál : Singulár

Juis : Dra. Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena multa US\$90.00

Iha 27 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu ACX hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 12 Janeiro 2024, iha oras tuku 20:00 kalan, arguidu tuku dala ida iha ofendida nia ibun, tuku dala ida iha ofendida nia inus, tebe dala haat iha kotuk laran rezulta ofendida monu ba rai. Arguidu kontinua sama ofendida nia liman belar ba iha rai no buti ofendida nia kakorok. Kazu ne'e akontese tanba arguidu ho ofendida diskute malu kona-ba arguidu fila hosi Waimori to'o iha Builale ofendida husu tuir kona-ba labarik sira la mai no arguidu hatan katak ofendida la iha direitu ba labarik sira ne'e

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak fila hosi Waimori foin to'o uma arguidu husu di'ak ka la'e maibé ofendida hatan ho nervozu. Tanba ne'e arguidu ho ofendida diskute malu no ofendida kaer arguidu nia liman dada sai hosi uma laran, nune'e arguidu hirus tuku dala ida iha ibun, tuku dala haat kotuk laran ofendida monu tun ba rai no buti kakorok. Maske nune'e, arguidu nega katak arguidu la sama ofendida nia liman no la tebe iha kotuk laran. Arguidu hatutan katak sira seidauk di'ak malu, maibé deklara katak arrepende ninia hahalok no foin primeiravés mai hatan iha tribunál.

Alende ne'e, ofendida deklara katak iha akontesimentu ne'e arguidu tuku dala ida iha ibun, tuku dala haat iha kotuk laran, no buti kakorok. Ofendida mós konfirma katak arguidu la sama ofendida nia liman no la tebe ofendida nia kotuk laran no deklara katak sira seidauk di'ak malu.

Alegasaun finál

Prokuradór haktuir katak arguidu provadu parsialmente komete krime alegadu no aktu nafatin priense krime ne'ebé imputa ba arguidu. Tanba ofendida nu'udar arguidu nia feen ho razaun hirak ne'e husu ba tribunál atu kondena arguidu ho pena multa.

Entretantu, defeza haktuir katak bazeia ba arguidu nia deklarasaun iha audénsia julgamentu husu ba tribunál atu fó pena ne'ebé justu ba arguidu.

Desizaun

Depoisde avalia faktu hotu, tribunál prova katak faktu sira seluk provadu hotu no faktu ne'ebé la provadu mak arguidu la sama ofendida nia liman no la tebe ofendida nia kotuk laran.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$90.00. Pena multa ne'e sei selu US\$1,50 kada loron durante loron 60. Tribunál mós fiksa pena alternativa durante loron 66 prizaun, bainhira arguidu la kumpri pena multa refere.

8. Krime ofensa ba integridade física simples ho natureza violénsia doméstika no krime ameasa

Nú. Proses : 0001/24. PDBAU
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Ambrósio Rangel Freitas
Defeza : Dr. Germano Guterres Ramos
Desizaun : Pena multa US\$60.00

Iha 28 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD no krime ameasa ne'ebé envolve arguidu BdSM hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 26 Agostu 2024, iha oras tuku 12:30 meiodia, arguidu basa dala rua iha ofendida nia hasan parte loos no karuk, tebe dala rua iha ofendida nia kidan parte loos no karuk. ~~depoisde agresau ne'e~~ Arguidu mós ameasa ofendida katak *"labele dehan ba família "se lae ha'u sei sona mate kedas ó,"!* Antes agresau ne'e, arguidu ho ofendida diskute malu kona-ba ofendida haruka arguidu atu halo sasoro maibé arguidu lakohi.

Prokuradór akuza arguidu kontra krime iha konkursu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) no 35(b) LKVD no artigu 157 KP kona-ba krime ameasa ho moldura penal to'o tinan 1 ka multa.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e la loos hotu. Arguidu argumenta katak iha akontesimentu ne'e arguidu nia inan mak ko'alia ba ofendida katak *"nusa mak la halo serbisu uma laran, la nono bee manas no selu-seluk tan"*, nune'e ofendida ho arguidu nia inan diskute malu. Hafoin akontesimentu ne'e ofendida ba hela tiha iha ofendida nia inan aman nia uma no la'os arguidu mak baku no duni ofendida.

Iha parte seluk, ofendida kontinua konfirma faktu no motivasaun problema iha akuzasaun. Ofendida hatutan katak arguidu nia aktu ne'e rezulta ofendida ta'uk, nune'e

ofendida diside ba hela tiha iha ofendida nia inan aman nia uma no to'o agora lakohi ona fila ba arguidu.

Alegasaun finál

Prokuradór haktuir katak akuzasaun ne'ebé akuza ba arguidu ne'e provadu hotu, mezmu arguidu koko atu nega faktu hotu iha akuzasaun, maibé ofendida kontinua konfirma faktu hotu iha akuzasaun. Prokuradór konsidera aktu ne'e akontese duni mak halo ofendida deside ba hela tiha iha ofendida ninia inan aman.

Tanba ne'e, mezmu sira moris separa ona maibé atu prevene arguidu la repete nia aktu ne'e iha futuro, husu ba tribunál atu kondena arguidu ho pena multa.

Entretantu, defeza haktuir katak haree ba arguidu nia deklarasaun iha audénsia julgamentu katak la halo agresaun ruma hasoru ofendida, nune'e husu ba tribunál atu absolve arguidu hosi prosesu ne'e.

Desizaun

Depoide avalia faktu hotu, tribunál fiar liu ba ofendida nia deklarasaun ne'ebé konfirma ho akuzasaun katak arguidu halo duni agresaun hasoru ofendida no ameasa ofendida, nune'e tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

9. Krime ofensa ba integridade física simples ho natureza violénsia doméstika

Nú. Prosesu : 0060/23. VQVQQ
Kompozisaun Tribunál : Singulár
Juisa : Dra. Albertina da Condição das Neves
Prokuradór : Dr. Julio da Silva Correia
Defeza : Dr. Sidónio Maria Sarmiento
Desizaun : Pena multa US\$120.00

Iha 30 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu YCJ (Sidadaun Xineza) hasoru nia feen (Sidadaun Timor), iha Munisípiu Vikeke.

Akuzasaun Prokuradór

Prokuradór akuza katak iha 02 Outubru 2023, iha oras tuku 10:00 dadeer, arguidu sama ofendida nia sorin parte karuk, foti kanuru suru rai nian baku dala ida iha ofendida nia ain parte karuk no baku dala ida iha ofendida nia liman fuan boot parte loos. Antes agresaun ne'e, arguidu ho ofendida diskute malu kona-ba ofendida atu ba partisipa ofendida nia alin nia lia kultura nian, maibé arguidu la autoriza.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arguidu la autoriza ofendida tanba ofendida nia familia foti sasan loja nian la selu, arguidu ho ofendida di'ak malu ona, foin primeiravés mai hatan iha tribunál no arguidu nu'udar sineza halo negosiu ho rendimentu kada fulan US\$300.00.

Alende ne'e, ofendida mós konfirma faktu hotu iha akuzasaun no deklara katak depoisde akontesimentu ne'e di'ak malu ona no to'o agora arguidu la baku ona ofendida.

Alegasaun finál

Prokuradór haktuir katak faktu hotu-hotu provadu bazeia ba konfisaun arguidu nian. Tanba ne'e mezmú sira di'ak malu ona maibé atu prevene arguidu repete hikas ninia aktu ne'e iha futuru, husu ba tribunál atu kondena arguidu ho pena multa US\$120.00.

Entretantu, defeza haktuir katak iha produsaun ba prova arguidu konfesa faktu ne'ebé nia komete, arrepende ninia hahalok no di'ak malu ona ho ofendida, nune'e husu ba tribunál atu kondena arguidu fó pena ne'ebé kmaan.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian ne'e provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$120.00. Tribunál ordena arguidu atu selu US\$2.00, kada lora durante lora 60. Tribunál mós fiksa pena alternativa durante lora 40 prizaun, bainhira arguidu la kumpri pena multa refere.

10. Krime ofensa ba integridade fízika simples ho natureza violénsia doméstika

Nú. Prosesu : 0069/23. VQVQQ
Kompozisaun Tribunál : Singulár
Juis : Dra. Sribuana da Costa
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena multa US\$45.00

Iha 20 Janeiru 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu ZdSG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 31 Outubru 2023, iha oras tuku 09:00 dadeer, arguidu tebe dala ida iha ofendida nia liman parte loos, tebe dala ida iha kidan parte loos no rezulta ofendida monu ba rai hafoin arguidu tuku tan dala ida iha ofendida nia liman parte loos. Kazu ne'e akontese tanba arguidu ho ofendida diskute malu kona-ba arguidu baku ofendida nia aman.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a) no 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontesementu ne'e sira di'ak malu ona, sira hahú forma família dezde tinan 2015, iha oan na'in rua. Arguidu deklara karak nia foin primeiravés komete krime hasoru ofendida, arrepende ninia hahalok no arguidu nu'udar agrikultór ho rendimentu ne'ebé la fiksu.

Entretantu, ofendida konfirma faktu hotu iha akuzasaun no deklara tan katak sira moris hamutuk dezde tinan 2015, iha oan na'in rua arguidu foin halo agresaun hasoru ofendida no depoisde akontesementu ne'e arguidu la halo ona agresaun to'o agora.

Alegasaun finál

Prokuradór haktuir katak arguidu nia aktu ne'e priense krime ofensa simples ho natureza violénsia doméstika ne'ebé akuza kontra arguidu. Mezmu sira di'ak malu ona, maibé husu ba tribunál nafatin kondena arguidu ho pena multa US\$60.00.

Entretantu, defeza haktuir katak arguidu konfesa faktu integralmente, arrepende ninia hahalok, di'ak malu ona ho ofendida, foin primeiravés mai hatan iha tribunál, nune'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$45.00. Pena mulat ne'e arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

11. Krime ofensa ba integridade fízika simples ho natureza violénsia doméstika

Nú. Prosesu : 0078/23. VQWCB
Kompozisaun Tribunál : Singulár
Juis : Dra. Sribuana da Costa

Prokuradór : Dr. Julio da Silva Correia
Defeza : Dr. Antonio Fernandes
Desizaun : Pena prizaun fulan 6 suspende ba tinan 1

Iha 30 Janeiro 2024, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu GdS hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 14 Feveireu 2024, iha oras tuku 15:30 lokraik, arguidu basa dala rua iha ofendida nia ulun, tuku dala ida iha tilun parte loos, tebe dala ida iha kabun tanba arguidu ho ofendida diskute malu kona-ba sira nia oan han hotu arguidu nia modo. Alende ne'e prokuradór mós relembra katak antes ne'e arguidu komete ona krime hanesan hasoru ofendida no kazu ne'e ho Nú. Prosesu 0018/18.VQWCB. Iha desizaun ba kazu ne'e tribunál kondena arguidu ho pena multa.

Prokuradór akuza arguidu kotra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, iha akontesimentu ne'e bainhira arguidu fila hosi natar ho kondisaun hamlaha atu han mak modo laiha halo arguidu hirus. Maibé depoisde akontesimentu ne'e sira di'ak malu ona, arrepende ninia hahalok no arguidu nu'udar agrikultór ho rendimentu ne'ebé la fiksi.

Bazeia ba pedidu hosi prokuradór tribunál presinde ofendida nia deklarasaun, tanba iha produsaun ba prova arguidu konfesa integralmente ba faktu hotu iha akuzasaun no hosi parte defeza konkorda ho pedidu ne'e.

Alegasaun finál

Prokuradór haktuir katak arguidu nia aktu ne'e priense krime ofensa simples ho natureza violénsia doméstika. Mezmu sira di'ak malu ona, maibé arguidu la hatudu nia arrependementu tanba antes ne'e tribunál kondena ona arguidu ho pena multa, no pena refere arguidu sente hanesan bai-bain de'it. Tanba ne'e atu prevene arguidu nia aktu ne'e iha futuro, husu ba tribunál atu kondena arguidu ho pena prizaun tinan ida suspende ba tinan rua.

Entretantu, defeza haktuir katak arguidu konfesa faktu ho integralmente, di'ak malu ona ho ofendida, kona-ba medida pena parte defeza entrega ba tribunál atu diside.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu no prova mós katak antes ne'e arguidu komete ona krime hanesan hasoru ofendida.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa no di'ak malu ona ho ofendida. Entretantu sirkunstánsia ne'ebé hatodan arguidu mak arguidu la hatudu ninia arrependementu, tanba arguidu mai hatan dala rua ona iha tribunál ho krime ne'ebé hanesan. Tanba ne'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

12. Krime ofensa ba integridade física simples ho natureza violência doméstica

Nú. Prosesu : 0045/23. VQWTL
Kompozisaun Tribunál : Singulár
Juis : Dra. Sribuana da Costa
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena multa US\$60.00

Iha 30 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu PSG hasoru nia feen, iha Munisípiu Víkeke.

Akuzasaun Prokuradór

Prokuradór akuza katak iha 19 Setembru 2023, iha oras tuku 04:00 dadeer, arguidu basa dala tolu iha ofendida nia kanuruk, tuku dala ida iha ulun parte loos no tebe dala ida iha kabun tanba arguidu no ofendida diskute malu kona-ba ofendida la informa ba arguidu antes atu lori sira nian oan ba iha ofendida ninia inan aman nia uma.

Prokuradór akuza arguidu kotra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese sira di'ak malu ona no arguidu la baku ona ofendida, foin primeiravés baku ofendida, arrepende ninia hahalok no arguidu nu'udar motorista kareta bis ho vensimentu kada fulan US\$250.00.

Alende ne'e, ofendida konfirma totalmente ba faktu sira iha akuzasaun, di'ak malu ona depoisde akontese arguidu la baku ona ofendida to'o agora moris hamutuk nafatin nu'udar feen ho la'en.

Alegasaun finál

Prokuradór haktuir katak akuzasaun prokuradór prosedente provadu haree ba arguidu nia deklarasaun no ofendida nia konfirmasaun ba akuzasaun iha audénsia julgamentu Maske nune'e, mezmú sira di'ak malu ona, maibé nafatin husu ba tribunál atu kondena arguidu ho pena multa US\$60.00.

Entretantu, defeza haktuir katak arguidu konfesa faktu ho integralmente, arrepende ninia hahalok, di'ak malu ona ho ofendida no foin primeiravés mai hatan iha tribunál, parte defeza husu pena ne'ebé justu ba arguidu.

Desizaun

Depoisde avalia faktu hotu, tribunál prova katak faktu asociadu sira ne'ebé imputa ba arguidu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1,00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

13. Krime ofensa ba integridade física simples ho natureza violéncia doméstika

Nú. Prosesu : 0022/23. VQVQQ
Kompozisaun Tribunál : Singulár
Juisa : Dra. Sribuana da Costa
Prokuradór : Dr. Ambrósio Rangel Freitas
Defeza : Dr. António Fernandes
Desizaun : Pena prizaun tinan 1 suspende ba tinan 2

Iha 30 Janeiro 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade física simples ho natureza VD ne'ebé envolve arguidu JVSG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 13 Marsu 2024, iha oras tuku 15:00 lokraik, arguidu tebe dala ida iha ofendida nia kotuk laran, buti kakorok no riba ofendida ba aspal leten tanba diskute malu kona-ba sira nia oan ne'ebé moras. Alende ne'e, prokuradór relembra fali katak antes ne'e arguidu komete ona krime hanesan hasoru ofendida no mai hatan ona iha tribunál no kazu ne'e ho Nú. Prosesu 0005/23.VQSIC, ba kazu ne'e tribunál kondena arguidu ho pena multa.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, depoisde akontese sira di'ak malu ona arguidu nu'udar motorista kareta mikrolet ho vensimentu kada fulan US\$150.00.

Iha parte seluk, ofendida mós konfirma faktu hotu iha akuzasaun. Ofendida deklara tan katak arguidu la tama uma kuaze semana ida no labarik mós moras kuaze semana ida

ona derepente ofendida hetan arguidu kondus kareta iha merkadu, nune'e ofendida ba husu tuir mak arguidu halo agresaun hasoru ofendida. Depoisde akontese sira di'ak malu ona to'o agora la baku ona ofendida.

Alegasaun finál

Prokuradór haktuir katak arguidu nia aktu ne'e priense krime ofensa simples ho natureza violénsia doméstika, mezmu sira di'ak malu ona maibé arguidu la hatudu ninia arrependementu atu prevene arguidu ninia hahalok no eduka mós sosiedade sira katak baku feen ne'e krime no hetan kondenasaun. Tanba ne'e husu ba tribunál atu kondena arguidu ho pena prizaun tinan ida suspende ba tinan rua.

Entretantu, parte defeza haktuir katak arguidu konfesa faktu hotu ho integralmente, di'ak malu ona ho ofendida agora sira moris hamutuk nafatin nu'udar feen ho la'em, nune'e parte defeza husu atu fó pena ne'ebé justu ba arguidu.

Desizaun

Depoisde avalia faktu hotu, tribunál prova katak faktu hotu iha akuzasaun prokuradór nian provadu hotu no prova mós katak antes ne'e arguidu komete ona krime hanesan hasoru ofendida no tribunál kondena ona arguidu ho pena multa.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, di'ak malu ona ho ofendida. Entretantu tribunál releva sirkunstánsia agravante mak arguidu la hatudu ninia arrependementu no mai hatan dala rua ona iha tribunál ho krime ne'ebé hanesan. Tanba ne'e tribunál konklui prosesu ne'e no kondena arguidu ho pena prizaun tinan ida suspende ba tinan rua.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>

